

Scuol guadogna il premi «Il Cristal» da la Pro Infirmis

Chasa da scoula Scuol: Object da referenza per oters

Dals passa 30 objects inoltrats ha la nominaziun dal cumün da Scuol persvas il plü ferm a la giuria. La chasa da scoula da Scuol es ün model exemplaric per construcziuns sainza obstaculs. Stefan Engler ha surdat il 6avel premi «Il Cristal» da la Pro Infirmis.

(pl) La Pro Infirmis es ün'organiziun svizra chi s'ingascha ferm per persunas cun impedimaints. Daspö il 2004 surdà l'organiziun grischuna minch'on ad üna persuna, ad ün'interpretarisa, ad ün'organiziun o eir ad ün'uniun chi s'ingascha da möd special pel bain dals impediti il premi «Il Cristal». Cun «Il Cristal 2009» vuol la Pro Infirmis sensibilisar la publicità per l'egualità e l'integraziun d'umans cun ün impedimaint. Pel premi 2009 sun stats in concorrenza objects chi correspuondan a las pretensiuns da la construcziun sainza obstaculs e sun fabricats per persunas cun impedimaints.

La gronda part dals 30 objects nominats han raggiunt las pretensiuns da la concorrenza e da la giuria. Nomi-

nats pel premi 2009 sun stats la chasa da scoula da Scuol, la butia Volg ad Andeer, l'entrada dal Cussagl Gronda a Cuaira, la piazza baselgia San Spiert a Puntraschigna e la pendiculara Razèn-Veulden. Persvas a la giuria, chi consistaiva da persunalitads da tuot il Grischun, il plü ferm ha la nominaziun dal cumün da Scuol. La chasa da scoula da Scuol saja ün model exemplaric per la construcziun sainza obstaculs e dess eir esser ün object da referenza per oters edifizis, ha dit cusglier guvernativ Stefan Engler in ocasiun da la surdada dal premi a Cuaira.

Il concept general da la chasa da scoula da Scuol cun rampas, muntas-chalas ed ün edifiziu annex cun ascensur, ha persvas la giuria in tuots regards. Ün'ouvra bain ponderada chi correspuonda a la pretensiun per sopchas cun roudas. Il nouv edifiziu annex da la chasa da scoula existenta nun es be üna masüra singula, mabain ün'ulteriura contribuziun a l'implant general concipi sainza obstaculs. Grazcha a la tenuta positiva dal cumün nun es il resultat üna lavur cun masüras punctualas, dimpersè ün'ouvra bain ponderada. Quist möd da construir sainza obstaculs garante-scha ün menaschi da scoula sainza

difficultats ed es la premissa per la scolaziun integrativa d'umans cun impedimaints. Üna recugnuschentscha speciala merita tenor l'opiniun da la giuria il fat cha'l cumün da Scuol – chi nu's rechatta finanziaimaing in üna situaziun comfortabla – s'ha de-

cis per üna soluziun optimala, malgrà ils cuosts supplementars. Cusglier guvernativ Stefan Engler ha surdat il premi «Il Cristal» da la Pro Infirmis al president cumünal da Scuol, Jon Domenic Parolini, chi s'ha muossà plü co vantüraivel da quist'onur.



Scuol ha fabricà intuorn la chasa da scoula da möd ch'ella es accesibla eir cun sopchas cun roudas – immez la chasa as vezza l'annex cun ascensur.

fotografia: Nicolo Bass